

Waa mid ka mid ah Suugaanta uu hal abuuray  
Maxamed Maxamuud Xassan (Gani). Waxaa  
lagu allifay Caasimadda Puntland ee  
Garowe, sida arartaba laga milicsan karo, xilli ay  
halkaasi ka socotey tartan loogu xusulduubayey  
doorasho madaxweyne iyo gole shacab.

Inkastuu munaasibaddaasi uu ku beegnaa  
gabaygu, haddana weli wuxuu yahay mid  
taagan, loona adeegsan karo in shuruudaha uu  
xambaarsan yahay la hordhigo cid kasta oo isu  
soo taagta ama u hanqaal taagta hoggaaminta  
shacabka danyarta ah ee Soomaaliyeed.

MMH Gani

## YAA MURASHAX NOQON KARA??

Mahad oo dhan Eebbaa  
Dhammaanteed mudnaan u leh  
Musdafaas Rasuulkii  
Micraajkii la dheelmiyo  
Salli Muxammad baa mudan  
Isimada murtidaloo  
Shirka miradhalkiisiyo  
Maslaxada u yimid baa  
Maamuusid naga mudan  
Ergada Madasha joogtaa  
Lama gaaro midigtee  
Marxabbiyo sallaan mudan  
Maareeyayaashii  
Hawsha Maamulkeediyo  
Dejintii martida iyo  
Lahaa kala maddayntana  
Maqsuud baan ka wada nahay  
Mahiiggaan onkoday iyo

Sida mayayga roobkoo  
Milaygiisi da'ayana  
Arartayda maqashee  
Usogudub marxalad kale  
Iyo madasha hawshaan  
Laga maamulaayoo  
Badiba loo martida yahay  
Nugaal Mahad Ilaahay  
Marsadeeda Nabaddaa  
Barroosinka ku mudatoo  
Malkadaynu joogniyo  
Minankaan Garowena  
Waa magaalo madaxdii  
Maamulka Puntland-oo  
Meeshay joqraafiga  
Kaga taallo maabkiyo  
Codkii mudanayaashoy  
Heshay maalintii iyo  
Mawlohoo la doontaa  
Mudanaanta siiyoo  
Marti soo dhoweyntana  
Inay magac ku leedahay  
Idinkay markhaantiya  
Miinleyda curatiyo  
Hakad meeriskaa geli  
Murtidana la sii soco  
Iyo dulucda maansada  
Maqane iyo joogaba  
Midbaa iga su'aal ahe  
**Yaa Murashax Noqon kara??!!**

Millateriga baranaye  
Yaa magac kaleeto leh  
Maatadiyo cayrtiyo  
Mucsarkiyo Indhoolkiyo  
Miskiinkiyo agoonkiyo  
Majaaniinta Waashiyo  
Marreydii haweenkiyo  
Miyi iyo Magaalaba  
Makhluuqyada ku nool iyo  
Mushtarkiyo mahaystaha  
Iyo Mahayamooggaba  
Mas'uul inuu ka wada yahay  
Yaa maankiisa gelin kara??  
Yaa maalkooda hayn kara?  
Oo malab sidiisii

Aanay ugu macaanayn??  
Yaan mu'ayidiintiyo  
Kalagurin mucaarade  
Kulli madax u noqon kara?  
Hadday xaajo murugtana  
Maaraynta yaa hela  
Iyadoon ahayn muruq  
Iyo xoog ku maamulid  
Mawjada rogmanayiyo  
Nabsi maalmo gudayiyo  
In waqtigu marxalad yahay  
Oon madax ahaantiyo  
Madluun-nimadu waarayn  
Uuna midiidin noqon karo  
Isagoo maqsuud ku ah  
Taajir magac lahaa shalay  
Yaa maanta garan kara?  
Oo madax hadduu helo  
Nagu mooraduugayn?  
Ama kii mucaarada  
Mabda'iisu suu rabo  
U adeegsan maafiyo?  
Midkanaa I xiga iyo  
Haybtayda mooyee  
Inta kale martabad maleh  
Meeshii manfacaliyo  
Madaarkiyo Dekedahana  
Annagaa ka madax noqon  
Miyay ina maraysaa???  
Inta maskax fayow iyo  
Mayay aniga nala tahay  
Inta kalese maaqaan!!!!  
Miyi iyo magaalaba  
Dhaqankaan marroorsamay  
Maaro yaa u heli kara?  
Yaan kursigu u muuqane  
Midda shacabka haysiyo  
Ka naxaaya maatada?  
Mabda' yaan ku raacnaa?  
Oon magac qabiil sidan?

Haddaan madax u doortana  
Yaan macangag noqonayn  
Afka yaan ku sedan malab  
Uurkana maddiiliyo  
Magli ugu qarsoonayn?

Oo midduu yiraahdiyo  
Milladdiyo sharciga iyo  
Dhaarta daba maryaynayn?  
Oo ka madax sarrayn Karin  
Sharci lagama maarmee?

Yaa mudnaan waxbarshiyo  
Meesha caafimaadkiyo  
Madaarkiyo marsada iyo  
Jidadkii la marayiyo  
Mahuraan degaankiyo  
Mawaashiga ku nool iyo  
Madhaafaanka siin kara?

Yaa madax horreetiyo  
Mas'uul soo ahaan jirey  
Oo gudaha magac ku leh  
Maamuus bannaankana?

Nin maraykan degeyoo  
Mar horeba dadkiisii  
Masruuf ay cunaan iyo  
Marashi ay xirtaan iyo  
Mudnaantii waxbarashada  
Makhsar yari ku helayiyo  
Maatadiyo shacabkan  
Dhibtu moxogga jebisoo  
Tacliin aan ka maarmine  
Makhsarkeedi waayo  
Maalmo aan dab shidanoo  
Maqaa ma dheregguna  
Ugu maca ron yahay  
Isku mawjad maahee  
Mahuratdiyo ciiddaan  
Yaa deggan mulkina ku leh??

Si aan madax u siinana  
Mashaariicda beenta ah  
Oo reer maqribigiyo  
Yurub muddo ku fulin Karin  
Anaa mirir ku qaban kara  
Iyo yaan na maqashiin  
Shacabka iyo maatadu  
Hadal ay mashxaradaan  
Oo maanka deeqoo  
Maqalkana u roonoo

Macquul aan ahaan Karin  
Lana mid ah macnaha guud  
Baddaan malab ka dhigayaa???!!!!!!!!!!!!!!!

Maanyada badweyntiyo  
Arladaan muggeed iyo  
Waxkastood ku miistaba  
Muggood iyo barkoodoo  
loo saaro midigtoo  
Maalinle aad u bixisoo  
Mushaarihii ma deeqdee  
Cadli yaa ku maamula  
Shacab wada muddici iyo  
Dhammaan muddac calayhi ah  
Oon lahayn markhaatiga  
Qiraalkiina maya yiri  
Muftigiina dhaartii  
Yiri waan la marinayn?!!!!!!

Mataan uur la seexdiyo  
Hadday madal ku diriraan  
Dubka miday wadaagaan  
Yaa kala maslixo kara  
Eexduna ka maran tahay?

Yaan mulaanka shacabkiyo  
Ka xanaaqin murankoo  
Muujin kara dulqaad iyo  
Dadka inuu u madax yahay?

Culumada milgadaliyo  
Yaa madaxda dhaqankiyo  
Dadka muqayiliintiyo  
Inta maqayiliinta ah  
Mid waliba martabadiyo  
Waxa uu ka mudan yahay  
Yaa magane garan kara?

Maalgelin shisheeyiyo  
Yaa muhandisiin iyo  
Macdantoo la qodo iyo  
Keeni kara mashaariic  
Horay loogu mari karo  
Oon ahayn midkii yiri  
Baddaan malab ka dhigayaa?

Ninkii maqasha daayacay  
Misna geela ii raaac  
Yeelimayno manatee  
Miinlayda gabaygiyo  
Maansadu waxay tiri  
Millateriga baranaye  
Yaa murashax noqon kara  
Oo magac kaleeto leh  
Aan midigta saarnee

Abwaankii mudnaayee  
Musdafiyo siduu yiri  
Madaxweyne kol idhaha  
Muraadkiisu nimu yahay  
Maya baynu wada oran??  
Madashiyo ujeeddada  
Loo yimi makaankaan  
Haddii ay murkucatiyo  
Hadday miradhal noqotaba  
Isimadaa mas'uul ka ah  
Iyagana mid baan iri  
Madaxweyne hadalkiis  
Meeshaas aan ku daayee  
Yaa mudanayaashii  
Noqon kara meteli laa  
Shacabka iyo maatada?  
Wax la soo magoogiyo  
Magalootiyaal iyo  
Haddaad madasha keentaan  
Dad mushaaro sugayoo  
Maya aan ka oran Karin  
Midigtaada ii goo  
Iyo madaxa labadaba  
Oowada muqaafil ah  
Oo mudanayaashii  
Laga dhigo meteli laa  
Maatadiyo shacabkan  
Meeshay wax mariyaan  
Idinkaa mas'uul ka ah

Midna waa xasuusine  
Abwaan baa marhore yiri  
Nin mushaaro sugayoo  
Jeebkiisu maran yahay  
Weligaaba maya iyo  
Haka sugin muddaafaco

Mid kalena waxay tahay  
Haddaan milixda lagu darin  
Waad ku miigataayoo  
Macaan malaha soortuye  
Waxa taas mataal u ah  
Haba mira yaraatee  
Haddaan maanka lagu hayn  
Maguuraanka beelaha  
Meesha looga badan yahay  
Waxay mudan yihiin iyo  
Inay milix sideedii  
Yihiin lagama maarmaan  
Miilaysi weeyee  
Inta muruqa weyn iyo  
Magaca is bidaayow  
Macne yeelan maysaan

Madaxdeenna dhaqankow  
Muwaafaqo haddii ay  
Dhexdiinnii ka maqantahay  
Shacabkoo midooboo  
Yeesha mawqif qura iyo  
Shirka miradhalkiisaba  
Mugdi baa ku jiri kara

Murtidiyo intaasaan  
Miinleydan gabaygiyo  
Maansadi ku soo xiray

MMH Gani

